



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

Stalin-i Tamil Nadu
CM tenangzükba agi

Tokyo Games atema
Sumit qualify süogo

VOL. XVIII NO. 203 (ADOK 203) DIMAPUR

KÜPTOKNÜ (SATURDAY)

MONUPII (MAY) 08, 2021

₹ 5.00

Anogo pezübuba totzö jenjang tuogo

New Delhi, May 7, 2021 (Agencies): Hokolbarnü oil marketing companies (OMCs)-i petrol aser diesel jenjang tasaktiba kümdaktsüogo.

Sorkar meyong totzö company temi tanü agi anogo pezübuba atongtepa totzö jenjang tujen tuogo aser March 24 o April 15 tsüingda jenjang ajemba ajak agienogo.

Tanü petrol litre nung poisa 28 aser diesel litre nung poisa 31 ajungket. Tesüiba anogo pezö tsüingda India kübok tesem ajungalen totzö litre nung Rs 1 tema ajungketogo.

Yashi tashi Delhi nung petrol litre nung Rs 90.99 agi ayok saka tanübo Rs 91.27 kümogo. Mumbai nung petrol litre nung Rs 97.61 kümogo aser maneni Kolkata (Rs 91.41), Chennai (Rs 93.15), Bengaluru (Rs 94.30), Hyderabad (Rs 94.86), Jaipur (Rs 97.65) aser Patna (Rs 94.31) lir. India kübok yimti kar nung

petrol litre nung Rs 100 ajangogo. Rajasthan kübok Sri Ganganagar nung petrol litre nung Rs 102.15 aser Madhya Pradesh kübok Anuppur nung Rs 101.86 lir.

Kasaji India nung diesel jenjang tasaktiba kümogo. Delhi nung diesel litre nung Rs 81.73 aser Mumbai nung Rs 89 kümogo. Maneni, Kolkata nung Rs 84.57, Chennai (Rs 86.65), Bengaluru (Rs 86.64), Hyderabad (Rs 89.03), Jaipur (Rs 90.25) aser Patna (Rs 87.68) lir.

Alima nung crude oil jenjang atuba ajanga India nung totzö jenjang atur. Talisa sorkar meyong totzö company temi assembly election agiba mapang totzö jenjang nung mekongshiba ajanga takoksa angubatem tang ajangzüksü meranger.

Tawa petrol aser diesel jenjang atuba ajanga linük nung sensotem aser shishilembartemi khuret talila abener.

PM Modi-i Manipur, Tripura & Sikkim CM temden jembia

New Delhi, May 7, 2021 (Agencies): Hokolbarnü Prime Minister Narendra Modi-i Manipur, Sikkim aser Tripura nung Chief Minister tem den COVID-19 tensa atema jembio.

May 6 nü Prime Minister Modi-i Andhra Pradesh, Odisha, Jharkhand aser Telangana chief minister tem den Jammu & Kashmir aser Puducherry nung lieutenant governor tem den jembia liasü.

Jharkhand Chief Minister Hemant Soren-i PM Modi den phone ajanga jembiba indang ashidang "Pai (Modi) state indang tensa jembitsü melena pa indang 'Mann Ki Baat' dang jembia" ta metetdaksü.

"Akhümsübu aliba Prime Minister-i tanü phone asü. Pai "Kaam ki baat" masü pa indang 'Mann Ki Baat' dang jembia. Pai tebilemsütem masüingdang aser teinyaktsütem indang mejembia" ta Jharkhand Chief Minister-i Twitter nung ashi.

PM Modi-i state dak sendakba tebilemsütem ashitsü mapang magütsü saka COVID-19 tensa indang dang jembiba atema Soren mepelar ta

ketdangsurtemi ashi.

**PARTYAJAKSENDE
AMENTSÜLA: SONIA GANDHI**

Külen, Congress president Sonia Gandhi-i Prime Minister Narendra Modi dang linük nung Covid-19 tensa atema tekaratiba nung party ajak senden ka ayonga amentsü ayongzükogo. Hokolbarnü Congress Parliamentary Party (CPP) senden nung jembidang Sonia Gandhi-i "iba wara anema mapa tajungba inyaksü atema parliamentary panel ajak külem senden amentsüla" ta ashi.

"Inyakyimbo shitak dang lir saka Modi'er sorkari India tashi aser rongsen timi mamshiteter. Modi'er sorkari asen linük nung alirtem atema meinyakteter" ta Sonia-isa ashi.

"Centre sorkari oxygen, medicine aser ventilators indang supply tajungba akümsü memolunger. Nübertem nungdakba peritsütsü atema parnoki vaccine peria order mesüteter" ta laisa metetdaksü.

"Modi'er sorkar indang vaccination policy ajanga Dalit, Adivasi, Other Backwards Classes aser sensaker million aika züingdoktsü" ta Sonia-isa ashi.

Tanü nungi CoWIN nung 4-Digit Code amshitsü

New Delhi, May 7, 2021 (Agencies): CoWIN system nung vaccine agiba indang osang aibelen agütsüba agientsü atema asüing nungi four-digit security code amshitsü ta Union Health Ministry-i Hokolbarnü metetdaksü.

Senso kari vaccine agitsü tenüing agütsü saka parnok nem vaccine agütsüogo ta SMS

aruba ajanga vaccine magiteter ta asüba osangtem angu. Iba ya vaccinator ajanga data entry nung aibelenba ta bushitetogo, ta Ministry-i ashi.

"Iba amala aibelen masütsü aser sensotem nem timtem magütsütsü atema May 8, 2021 nungi CoWIN system nung four-digit security code ka amshitsü" ta parnokisa ashi.

COVID-19 Nagaland: Nisung timtibadak putet; 15,580 kümogo

Kohima, May 7, 2021 (TYO): Hokolbarnü Nagaland nung nisung timtiba dak COVID-19 aliba putetogo.

May 5, 2021 nü nisung 287 dak putetbaji taküm küm asoshi nisung timtiba dak putetba ta züingshia liasü saka tanü nisung 309 dak COVID-19 putet.

"Tanü nisung 309 dak COVID-19 putet. Parnokji Dimapur nung nisung 200, Kohima nung 63, Mon nung 32, Mokochung nung 9, Phek nung 3 aser Zunheboto nung 2 lir. Külen, tanü nisung 112 taneptsü angu. Parnokji Dimapur nung 102, Kohima nung 9 aser Peren nung 1 lir" ta Health & Family Welfare Minister, S Pangnyu Phom-i metetdaksü.

Tanü putetertem züingsema nisung ajak agi 15,580 kümogo. Tang tashi nung nisung 12,540 taneptsü

CATEGORY	%	NUMBER
Armed Forces	31%	4897
Returnees / Travellers	18%	2808
Traced Contacts	41%	7275
Frontline Workers	4%	600

ngugogo aser 2,433 anepaludar, ta paisa ashi.

Nagaland nung COVID-19 agi shirangertem taneptsü angubaji 80.49% dang kümogo.

Tanü COVID-19 agi shiranger ka asüba züingsema tasür ajak agi nisung 122 kümogo, saka parnok 10 bo tanga timtem ajanga asü. Nisung 485 tashi tanga state temi ogo, ta Minister Pangnyu-isa metetdaksü.

"Brihostibar tashi nung Nagaland nung nisung 1,75,398 nem COVID-19

vaccine dose 2,22,763 agütsüogo" ta State Immunization Officer Dr Ritu Thurr-i metetdaksü.

Vaccine agirtemji frontline workers 51,291, healthcare workers 14,979 aser arishi küm 45 ser temapur 1,09,128 lir, ta pai ashi.

"Vaccine agirtem rongnung parnok 47,365-i dose anaprong agiogo. Parnokji front-line workers 26,172, healthcare workers 9,955 aser arishi küm 45 ser temapur 11,238 lir" ta Dr Thurr-isa metetdaksü.

Nija mozü kitem nung COVID-19 agi shirangertem anepalutsü

Dimapur, May 7, 2021 (TYO): Nagaland sorkari state nung nija mozü kitem dang COVID-19 agi shirangertem anepalutsü aser rondak nungdak atema yipden 50% ayutsü tetuyuba agütsüogo.

Nagaland nung COVID-19 kanga putetba nung ajemdaker Nagaland Chief Secretary J Alam, IAS-i iba tetuyuba agütsü.

Nagaland Civil Secretariat nung aliba state-level COVID war room nung ICU beds, oxygen-supported beds aser ward beds atema jembio. Nija mozü kitem nung COVID-19 agi shirangertem anepalutsü atema May 3 aser 4 anogotem nija mozü ki ketdangsurtem jembio, ta paisa ashi.

Senden amenba sülen state sorkari Standard Operating Procedure nung aliba ama nija mozü kitem dang COVID-19 agi shirangertem anepalutsü atema parnok ket nung aliba normal wards aser ICU nung 50% lemezüka ayutsü tetuyuba agütsü.

Iba mapa ya District Task Force-i repranga inyaksü ta sorkarisa ashi.

Sorkarisa nija mozü kitem dang COVID-19 agi shirangertem dang nungi sen talila magitsü atema metetdaksü.

COVID-19 agi shirangertem anepaluba mozü ki ajak nung flu corner lapoktsüla aser idakji COVID-19 agi shiranger asütsü akok ta temolung meleme bilemertem tendangtsüla. Maneni, mozü ki ajak nung isolation facility alitsüla, ta Nagaland state sorkarisa metetdaksüogo.

Mozü kidang anepalutsü atema anioker ajak dak rapid antigen test mesüra Truenat/CBNAAT mesüra RT-PCR ajanga COVID-19 tendangtsüla, ta sorkarisa ashi.

Mizoram sorkar mapa inyaker temi anogo ka sen tenlar Aizawl, May 7, 2021 (Agencies): Covid-19 wara anema raratsü atema Mizoram sorkar mapa inyaker temi parnok itasen nungi anogo ka sen sorkar nem agütsütsü telemtetba agiogo.

"Brihostibarnü sorkar mapa

inyaker temi telok balala senden ka amendang COVID-19 wara anema inyakba maparen asoshi anogo ka sen agütsütsü telemtetba agi" ta Federation of Mizoram Government Employees and Workers (FMGEW) tir Vanlaltlana-i metetdaksü.

FMGEW ya Mizoram nung sorkar mapa inyaker ajak atema tentet ka lir. Iba nung sorkar mapa inyaker telok 100 tema dena lir.

State sorkar kübok itasen shitak angur ajaki May itasen nungi anogo ka sen agütsütsü, ta Vanlaltlana-i ashi. Pa ya Mizoram Power & Electric department nung chief engineer lir.

Iba nung contractual aser muster roll employees medendaksü, ta paisa shisem.

Yaküm-a Mizoram nung sorkar mapa inyaker temi Covid-19 azüoktsü atema inyakba mapa nung amshitsü atema ita ana indang itasen magi. Ajisüaka, state sorkari senji mapang tatsüka lir agütsü, ta Vanlaltlana-isa metetdaksü.

"State sorkari Covid-19 anema inyakba nung FMGEW-i anogo ka sen agütsü yariteptsü lemtetba atema kanga pelar" ta chief minister Zoramthanga-ia metetdaksüogo.

"Yaküm Covid-19 wara mapang sorkari Rs 56.10 crore shi endokogo" ta Covid-19 atema state spokesperson Dr. Pachua Lalmalsawma-ia metetdaksü.

Tongpang Ozüküm-i Longmisa yimdak 'circular road' ka online ajanga lapoktsü



Tongpang Ozüküm-i pa tsüngtong maruaka online (virtual) ajanga Longmisa yimdak 'circular road' ka lapoktsür külen putu yimsüsür aser sentong nung shilem agirtem noksa nung ankur. Longmisa, May 7, 2021.

Longmisa, May 7 (TYO): Nagaland PWD Housing & Mechanical Minister, Tongpang Ozüküm-i May 7 nü Longmisa yimdak pa tsüngtong marui online (virtual) ajanga dang 'Circular Road' ka lapoktsüogo. Iba Circular Road-ji Longmisa süngküm nungi par yim ground tashi lir aser ibaji kilometre ka shi asütsü. Iba lenmang ya SRDP kübok 2020-21 kümsük atema aruba sen nungi yangluba lir.

Tanü Minister Tongpang Ozüküm-i iba lenmang lapokja jembidang, tsüngtong marui virtual yimya nung Longmisa yimdak sentong nung adenbaji pa atema mezüngbuba aser otsüsütsü ka asütsü, ta ashi. Kanga dang nüngdaka aliba iba circular lenmang renemtetba asoshi iba mapa achayanger den yimertem aser Longmisa

Independent Party ajak dang meranga inyakba asoshi pelaba lemsatop.

Iba lenmang yanglutsü atema Nagaland Chief Minister, Neiphu Rio-i Special Road Development Program (SRDP) sentong kübok senotsü teyari agütsüba asoshia pa dang pelaba metetdaksü.

PDA yimyim "temelenshi arudar" ta asüba nung ajemdaker Nagaland tesem balala nung temelenshi balaka atalokdaki, yamaji iba lenmang yaa PDA yimyim ama inyakba maparen ka lir, ta ashi. Longmisa ya yim tulu, yamaji teinyaktsüjia jenti dang lir, saka mapa ajakji khenyongibo meinyakmatsü, anungji, nüngdakbatemji asenoki ka khen ka khen ta inyakyonga odi, ta paisa shisem.

Iba sentong nung Longmisa

Village Council Chairman, Yashiema Jamir-i mapang tatsüka agia jembidang, iba lenmang ya yimertem atema tongtibang aser kanga dang nungdakba ka liasü, sorkari agütsüba sen agi meperi Minister Tongpang Ozüküm-i sen inoksemer iba lenmang tajungtiba renemtsüba asoshi par kibong dang pelaba metetdaksü.

Iba sentong nung Pangerzülu Jamir menden liasü. 24 Angetyongpang A/C Independent Party President - Nungshimangyang Ozüküm, Independent Party Longmisa Unit President - Nungshikaba Jamir, Longmisa Baptist Arogo Secretary - Sentitemjen Pongen aser yimsüsür - Nokentemjen Pongen parnokia sentong nung shilem balala agia liasü.

Manipur nung COVID-19 cases 600 tasen liasü

Imphal, Monupii/May 07 (Agencies): Manipur nung COVID-19 cases aiba putetba osang ka liasü. Hokulbarnü Manipur nung nisung tasen 600 dak COVID-19 tashidak puteta liasü.

Item cases 600 nungi tebur 307, tetsür 269 aser state nung aliba Central Armed Paramilitary Forces nungi cases 24 liasü.

Hokulbarnü nisung tasen 600 dak COVID-19 putetba ajanga tang Manipur nung active cases 3506 kumogo.

Manipur nung tang COVID-19 active cases 3506

aliba nungi nisung 3330 ya nüburtem aser nisung 176 ya state nung aliba Central Armed Paramilitary Forces tem alitsü.

Manipur nung Hokulbarnü tashinung COVID-19 agi meneper ajak senteper nisung 34,333 jungogo.

Maneni Hokulbarnü Manipur nung COVID-19 agi nisung ana asü. Kakching nungi arishi küm 47 tain tebur ka aser Imphal East nungi arishi küm 65 tain tebur ka asü.

Manipur nung tang tashinung COVID-19 agi asür ajak senteper nisung 449 alitsü.

Tesüiba ghonda 24 tsüngta COVID-19 agi shiranga alir nisung 83 taneptsü nguogo, ta osang ka ajanga ashi.

Parnok ya home isolation nung alir nisung 53, JNIMS nungi ka, RD wing nungi 13, CCCBB nungi ana, Churachandpur District Hospital nungi ka aser SHRI nungi 13 alitsü, ta Manipur Health Department sangdong ka ajanga ashi.

Tang Manipur nung COVID-19 nungi taneptsü anguba ya noklang nung shilem 88.48 alitsü.

May 10 nungi Itanagar Capital Region shibangtsü

Itanagar, Monupii/May 07 (Agencies): Arunachal Pradesh sorkari Itanagar Capital Region (ICR) nung May 10 nungi lockdown benoktsü teletmetba agiogo.

ICR nung May 10 nungi tenzüksü aliba lockdown ya hopta ka atema alitsü.

ICR nung COVID-19 cases tali akumba ajanga lockdown benoktsü ya teletmetba agia liasü.

Itanagar Capital Region nungya Itanagar, Naharlagun

aser Banderdewa dena lir. Iba tesem shibangtsü atema osang ya ICR Deputy Commissioner Talo Potom-i Hokulbarnü sangdonga liasü.

"Itanagar Capital Region nung ajungbena COVID-19 cases aika akumba mechi May 10 nungi tenzüka shibangtsü teletmetba agiogo," ta ICR Deputy Commissioner Talo Potom-i ashi.

"COVID-19 positive cases ajungbena aika akumba aziüktsü asoshi jelia mera agiba ama ICR

shibangtsü," ta pai ashi.

Lockdown mapang tsüngsü apuba maparen inyaktsü, ta Talo Potom-i ashi.

Maneni ICR district administration ajanga ICR nung tesem kar 'micro-containment zones', ta Brehostibarnü sangdonga liasü.

Arunachal Pradesh nung aonung curfew 9:00 ako nungi tenzüka liasü, saka mapang melenshia nikongdang 6:30 ako nungi anepdang 5:00 ako tashi alitsü metetdaksüogo.

Ghonda 48 atema State Forensic Laboratory shibangtsür

Dimapur, Monupii/May 07 (TYO): Deputy Commissioner aser DDMA, Dimapur mendenpuba, Rajesh Soundararajan, IAS sangdong ka nung, Aoyimkum village, Dimapur Rangapahar Road nung aliba State Forensic Laboratory ya iba osang sangdongba anogo nungi tenzüka ghonda 48 atema

shibangtsür, aser iba mapang ketdangsürtemi mürekmejuba maparen inyaktsü, ta May 6, 2021 nü metetdaksü. Iba totuyuba nung aibelener nem Disaster Management Act 2005 indang Section 51 nungi 60 aser IPC indang Section 188 nung mela aliba ama merenshitsü, ta sangdong ajangasa ashi.

shibangtsür, aser iba mapang ketdangsürtemi mürekmejuba maparen inyaktsü, ta May 6, 2021 nü metetdaksü.

Iba totuyuba nung aibelener nem Disaster Management Act 2005 indang Section 51 nungi 60 aser IPC indang Section 188 nung mela aliba ama merenshitsü, ta sangdong ajangasa ashi.

Tuensang Town Council ward delimitation osang metetdaksü

Dimapur, Monupii/May 7 (TYO): Deputy Commissioner Tuensang, Kumar Ramnikant, IAS-i sangdong ka ajanga, May 4 nü Tuensang Town Council dak sendakba nung Delimitation Board senden nung lemtetba dak ajemdaker osang ka metetdaksüogo.

Nagaland Municipal (delimitation of Wards) Rules, 2003 dak ajemdaker Delimitation Board-i, Tuensang Town Council kübok kiyong tasen ana kümtetsü atema teletmetba agiba pai metetdaksü.

Kiyong telemsa yamai alitsü

1. NST WARD (14)

- | | |
|------------------------------|--|
| i. Ward No. | : 14 (Fourteen) |
| ii. Kiyong nüngja | : NST |
| iii. Arrtsü | : North: Home Guard Sector, HS 'A' Ward
: South: Bazar 'B' Ward
: East: Bazar 'A' Ward
: West: 3rd NAP Nullah |
| iv. Kiyong nung kibong | : 339 (2011 census) |
| v. Kiyong nung nütsünyongsük | : 1833 (2011 census) |

2. HAKUSHANG WARD (15)

- | | |
|------------------------------|---|
| i. Ward No. | : 15 (Fifteen) |
| ii. Kiyong nüngja | : HAKUSHANG |
| iii. Arrtsü | : North: Laiket Sector, St John 'A' Ward
: South: Nyaklangbou, St John 'B' Ward
: East: Chenyangsi and Phinjang Colony St John 'A' Ward
: West: 3rd NAP Nullah |
| vi. Kiyong nung kibong | : 271 (2011 census) |
| v. Kiyong nung nütsünyongsük | : 1606 (2011 census) |

Iba dak sendakba nung, tashishitsü mesera tebilemdangba kar danga lemsateptsü lira osang agütsüba anogo nungi tenzüka anogo tenet tsüngda benoktsü atema DC-isa metetdaksüogo.

Guwahati railway station nung Covid Care Coaches 21 lapok



Guwahati, Monupii/May 07 (Agencies): COVID-19 agi shirangertem anepalutsü atema, Northeast Frontier Railway (NF Railway) ajanga Guwahati Railway Station nung Covid Care Isolation Coaches 21 yoka lir.

Item Covid Care Isolation Coaches nungya coronavirus tashidak wara agi meneper anepalutsü asoshi tongtipang medical osettem inokja lir.

Ano Covid Care Centre ama inyaktsü atema rail coaches 20 tashi Guwahati, Badarpur, Lumding, Tinsukia aser Bongaigaon railway station tem nung yoka lir. Item coaches nungya oxygen bed 350 lir.

Assam nung COVID-19 cases kanga sashia züina akumba mapang COVID-19 agi meneper anepalutsü atema mozüki nung yipten agi anünger.

Bodhbarnü Assam sorkari NF Railway dang state kübok tesem balala nung Covid Care

Coaches 150 reneptsü asüngdanga liasü.

State balalai meshiba ama Indian Railways ajanga tesem balala nung Covid Care Coaches tem agütsür.

State nung railway ajanga isolation coaches 4,000 jungnüa yanglu aser yangji isolation unit ama amshitsü yipten 64,000 jungnüa lir.

Kasa mapang Assam nung COVID-19 agi asür nisung 1,531 jungogo, kong tesüiba ghonda 24 tsüngda coronavirus tashidak agi asür nisung 46 liasü.

Hokulbarnü Assam nung nisung tasen 4,936 dak COVID-19 tashidak puteta tang state nung iba virus agi meneper ajak senteper nisung 2,77,687 jungogo aser active cases 31,829 alitsü.

Tang Assam nung nisung 100 dak tendangba nungi shilem 8.04 dak COVID-19 puteter.

Tiprasa nunger atema INPT-i TIPRA den loktep



Tiprasa nunger atema INPT-i TIPRA den loktep

Agartala, May 7, 2021 (Agencies): Hokolbarnü Indigenous Nationalist Party of Twipra (INPT)-i Tipraha Indigenous Progressive Regional Alliance (TIPRA) den ka kuma loktepogo.

Tanü Ujjayanta Palace nung osangbener senden ka nung INPT tanishir Bijoy Kumar Hrangkhawl aser chuba jabaso Pradyot Bikram Manikya Deb Barman nati iba

osang metetdaksü.

Tesüiba ita ishika onok lokteptsü atema jembia aru aser state nung alirtem aser Tiprasa nunger tagitüba atema onok longjemogo, ta Deb Barman-i ashi.

INPT-i kanga dang shisa kaa inyakba atema pelar aser iba yagi party tashi itshitsü, ta paisa metetdaksü.

"Ni Union Home Ministry dangi TIPRALAND balaka kumtettsü olemteptsü atema osang sangoktsüogo" ta Deb Barman-isa ashi.

Tripura Tribal Areas Autonomous District Council (TTAADC) election nung TIPRA aser INPT külemi yaritepa toktep aser menden 28 nungi 18 nung takok ngua liasü.

Zubeen Garg-i par ki COVID care centre akümstsü tenla



Guwahati, May 7, 2021 (Agencies): Assam kübok Guwahati nung COVID-19 kanga prokshiba mapang ka nung Assamese kentener Zubeen Garg-i par ki COVID care centre akümstsü atema tenlaogo.

Bodbarnü Zubeen Garg den

pa kinungtsü Garima Saikia Garg nati Assam sorkar dang tena ki COVID care centre akümstsü atema shidangogo.

Tena indang ki ya Guwahati kübok Kahilipara nung lir aser iba osang ya Garima Saikia-i Instagram nung metetdakja

liasü.

"Brindaban Supermarket aser Brindaban Theatre tenung nung onoki government/administration dang Kahilipara nung azüklen menden ana amentepa atuba ki COVID care center ama amshitsü melar" ta Saikia-i ashi.

Garg'er ki ya COVID care center kümra Assam nung COVID-19 agi shirangertem atema yipden peria maliba khuret ajema akümstsü.

Tesüiba ghonda 24 tsüingda Assam nung nisung 4,936 dak COVID-19 aliba putetogo aser parnok züingsema nisung ajak agi 2,77,687 kümogo. Tang nisung 31,829 anepaludar. Assam nung COVID agi shiranga asür nisung 1,531 kümogo.

Non-BJP sorkar akümstsü atema Congress-i yaritsü: Saikia

Guwahati, May 7, 2021 (Agencies): Bharatiya Janata Party (BJP)-i Assam nung taruba chief minister indang osang mesangoktsüba ajanga taoba chief minister Sarbananda Sonowal aser North-East Democratic Alliance convenor Himanta Biswa Sarma na tsüingda mangatettep adoka lir ta nisungtemi jembir.

BJP national leadership-i chief minister shimtsü atema tetsükdaksü tulu ajurua lir kechiyong küm aika Congress sorkartemi yimsüa aruba North east state aika nung Sarma-i BJP-i aniba sorkartem akümbsa nung tongti shilem agiogo.

Manipur aser Meghalaya nung BJP-i menden peria mengutetaka Sarma-i BJP-i aniba sorkartem kümdaktsüba ajanga otsü tasen ka yangluteta liasü.

Sarma-i minister mesüra

deputy CM indang menden kecha magizüksü ta osang kar ajanga ashir.

Iba ama mapang ka nung Sarma-i Congress-i aniba 'Mahajot' den yaritepa sorkar akümstsü lenmang lir.

Assam nung non-BJP sorkar ka akümstsü atema BJP den yaritepertem- Asom Gana Parishad (AGP) aser United People's Party Liberal (UPPL) teloktemi teyari melenshitsu lenmanga lir.

Iba ama mapang ka nung Congress lennir Debabrata Saikia-i Assam nung non-BJP sorkar ka akümstsü atema Congress-i yariteptsü renema lir ta metetdaksüogo.

"Ni nisung tenung metetshir kechiyong nisung aika lir. AGP-ia Assam ajungtsü indang jembia arur. Anungji, Assam nung non-BJP sorkar ka akümstsü atema onoki

parnok nungita yaritsü. Ni onok high command danga iba atema mepishitsü" ta Saikia-i osangbener dang ashi.

West Bengal aser Tamil Nadu nung chief minister temi tezüngzüktep agiogo saka BJP-i Himanta Biswa Sarma aser Sarbananda Sonowal tsüingda meshimtetli lir.

"Congress sasep nung mangatettep adoker ta BJP-i tai tonglokja arur, saka tang Assam nung Covid tebilemstsü agi timtemba mapang ka nung parnok lenisüba tashimaitba sayuogo. Iba ya Assam nunger atema tesasatsüka lir" ta Saikia-isa metetdaksü.

Assam nung taruba chief minister inyaksü nübo shimba osang memetetdaksüba ajanga COVID tensa atema tiptema meinyakteter aser iba ajanga nübertem timtemer, ta paisa shisem.

Taruba CM indang jembiba dang nungibo COVID-19 anema raraba tongtipangba: Sonowal

Guwahati, May 7, 2021 (Agencies): Assam nung taruba Chief Minister indang jembiba dang nungibo COVID-19 anema raratsü tongtipangba ta taoba Chief Minister Sarbananda Sonowal-i ashi.

May 2, 2021 nü Assembly election results adokba sülen Sarbananda Sonowal-i tang mezüing atema BJP sorkar akümstsüba olen jembio.

"Onoki Assam nung sorkar akümstsü. Iba atema shisabulutsü nungdak mali. Saka onok asoshi tongtipangtibaji Assam nunger COVID-19 nungi kümzüka ayutsüba lir" ta Sonowal-i ashi.

"Anogo ana-asep ka tsüingda Assam nung sorkar

akümstsü atema telemtetba agitsü. Kobi melii Parliamentary committee indang senden ka ayonga amentsü aser idangji tatembang telemtetba ka agitsü" ta paisa metetdaksü.

Guwahati nung aliba Indira Gandhi Athletic Stadium nung COVID Care Centre semdangba sülen Sonowal-i iba osang metetdaksü.

Sonowal-i COVID Care Centre indang osangtem metetpela aser paisa ashiba agi Assam Health Department-i state nung COVID-19 azüoktsü atema tanen makai inyakdar.

Assam Health Department-i lockdown mebenoki COVID-19 prokshiba azüoktsü atema meranger, ta paisa shisem.

Swine flu ajanga ak 1700 tema asü

Aizawl, May 7, 2021 (Agencies): Mizoram kübok tesem balala nung African Swine Fever (ASF) ajanga ak 1,700 jungnüa süogo.

Tesüiba hopta ishika AFS wara poktetdak ak asüba ajema kümogo saka iba wara state ajungalen prokshir, ta Animal husbandry and veterinary department joint director (Livestock Health) Dr Lalhmingthanga-i ashi.

Taoba mapang state sorkari Lungsen yim, Lunglei kübok Electric Veng tesem, Aizawl kübok Armed Veng aser Edenthar, Serchhip district kübok Keitum aser Siaha jila kübok Vaipi-I tesemtem African Swine Fever poktetdak ta sangokja lir.

ASF ajanga ak 1,728 tashi süogo. March 21 nü Lunglei district kübok Lungsen yim nung ASF ajanga ak mezüingbuba asüba osang angazük.

"ASF ajanga Rs 6.91 crore shi takoksa bentsür aruogo" ta Dr Lalhmingthanga-i metetdaksü.

Brihostibarnü Mizoram kübok tesem balala nung ASF ajanga ak 21 asüba osang angazükogo. Iba wara ajanga district pungu- Aizawl, Lunglei, Serchhip, Lawngtlai aser Mamit kongshiogo, ta Lalhmingthanga-isa ashi.

Bangladesh aser Myanmar nungi ak bener aruba ajanga ASF wara poktet ta ktdangsurtemi ashi.

Superintendent of Excise-i süpokrem meshiba atema apu



Superintendent of Excise-i süpokrem meshiba atema apu

Dibrugarh, May 7, 2021 (Agencies): Assam nung Superintendent of Excise, Manshlyoti Das-i yi ayokba dokan ka nungi tashiyim agi süpokrem meshia agiba atema tai tonglokja puogo.

Tinsukia district nung Assam Police Anti-Corruption Bureau (ACB)-i Das den office peon Arjun Basfore na apu.

ACB ktdangsurtemi Das aputsü atema tasa ka atonger pa apu.

ACB ktdangsur 11 tashi

Tinsukia kübok tesem balala nungi Das indang osang metettsü atema yok.

"Pai süpokrem meshia agiba osang angazükba sülen ACB-i Tinsukia nung pa aputsü atema tasa ka atong.

ACB ktdangsur 11-i iba tasaji atong aser pai süpokrem sen meshia agidang parnoki pa apu" ta police-i metetdaksü.

Manshlyoti Das den külemi apuba Arjun Basfore naprong Guwahati-i anir aotsü aser special court ka tsüingdang ken o benoktsü ta osang ajanga ashi.



TIR YIMYIM YIMOBILEM (EDITORIAL)

DIMAPUR KÜPTOKNÜ, MONUPII (MAY) 08, 2021

Kaketshisatsü anetdak, Mokokchung!

Mokokchung district ya Nagaland nung tanga district-tem ajak dang nungi tamapur (pioneer) ta asenoksasa shitetba kuli kaji, Khristan yimsü tajung agizükba dang masü saka kaketreju dena lapoka kaketshisatsü angazükdak mongchen tajung kuma mesemetetba mapa ya asütsü. Iba jagi, Ao lima ya Naga nunger ajak asoshi kaketshisatsü anetdak tesem tajung aser tongtibang ka aküm. Aji oda, Aotsür Aoertem dang masü saka Naga nunger anüdok aser anülulen alirtem aika Impur aser Mokokchung-i kaketshisatsü bushia arua azüing. Tanü item taküm aser kibongtemji aika Aotsür Aoertem dang nungi kanga agia temetetba aser jenjang tajungba nung lidagi. Aji oda, 1980s tetenzüklen tashi Mokokchung district kübok lapoka akaba government high school-tem nung dena tangalen nungi kaketshirtem longsulongua arua azüingba mapang liasü. Ajisüaka, kong komaser kaketshisatsü anetdak alirtem toang tangaleni kaketshisatsü aneti aotsüsa akümar memetetika dang, tanübo Mokokchung district nungbo government high school aser college-bo mali ama, Aotsür Aor kaketshirtem aika bendangleni kaketshisatsü bushii aoba angur. Iba ama mapang ka nung, Mokokchung nung osangbenertemi Fazl Ali College tia oagi reprangdangbaji, Mokokchung dak aketba tenüing aser teronem tajung to ano khen shia arudaktsünüba tejangraba aser taginüba ka sayuba mapa ka asütsü. Atangji, Fazl Ali College ya Mokokchung nung tejentiba college ka lir aser joko küm 60 jungogo. Aji oda, tamasabo Arts college dang tenzükba, tangbo Science dena sayur aser joko linük nung kaketshisatsü sayuyim melenshi nungji, yakta Fazl Ali college nunga tang sayua aliba subject-tem dak tali bendenloka sayutsüsa akümtsü. Iba nükla nung tang ya kaketreju ajak kiojen aser sayuyim tasen angazükba nung terenemshiba mapang ka lir. Tangbo ano inyakyim tajung saka ano tekümdangtsü kaji, kaketreju kobasüdir süaka, ajung majung kecha mesükshii ajak maneni lapoka aotsü ta masü saka majungba kaketrejutembo shibangtsü aser tajungba purtembo ano tajungba kuma aotsüsa yaritsü ta government sentong lir. Ibayongji, talisa Higher Education jenjang nung college kwika lapoka lir, item jenjangtemji asadangtsü atema mapang shia University Grant Commisison-i shimtetba National Assessment and Accreditation Council (NAAC) telok arua kaketreju renlokba aser inyakyim ajak asadanga repranger külen pei mapa dak alang jenjang (grade) C nungi A++ tashi agütsür. Aji oda, college ka asoshi NAAC purtem arua reprangdang alangtettsüba jenjangji kanga tongtibang lir, kechiyong iba yariji dang UGC nungi college aser university terenlok atema senotsü lemzüktsütsü. Tang Fazl Ali College jenjang ya B grade nung lir. Ibaji C aser A na tsüngda, anungji tamajunga masü, tajunga masü saka teyari ka dang ta sayur. Iba jenjang nung jagi, joko, A+ grade angutsü merangtsüba dak alaka tamajungba jenjang kati alu nungbo teyari lenmang mesadamba akümtsü, kechiyong tanü putu tasenba inyakyim yabo, yangi tamalen shisemba ama, tamajunger ajungshipet ajungshia aser yarisema tajung kümdaktsütsü merangba putu masü saka tajungertemang tajungba kümdaktsütsü merangba putu lir, kechiyong tajungertema yarir meyarimar. Aji oda, College asoshibo NAAC Peer team arutsübaji tsüngrem arutsü amai renemteper. Iba ama mapang ka nung ali tenla agütsürtemi anir yimten, arogo aser kija kibongi college ajungtsü atema tenla tapu balala agüja yaribaji government asoshi tayongzükba aser nübortem asoshi temoatsü tulu asütsü. Ajisüaka, ano külen, iba ama kaketrejutem rongnung tajungtiba asütsü toktepa mapang ka nung, Fazl Ali College nungbo Rashtriya Uchchar Shiksha Abhiyan (RUSA) sentong ajanga center government-i yokba sen agi ki ka merenemet odang toktsübaji, tanü aser asüing kaketshirtem asoshibo takoksaji ki ka dang nung jagi meyrirjangben agi tuluba aser teimba akoksatsüba mapa ka lir, kechiyong iba kiji merenemetba agi kasa RUSA sentong ajanga tangar college kiojen ter metsü renema aodang, FAC asoshibo senotsü lenmang shibangadoktsü. Ibaji, talisa, AKM-i kanga temulung agüja bushisüngdanga inyaksüba mapa ka asütsü. Mokokchung nung Kisama mali, anungji tangar sobaliba benjongbentsü reprangi marur aser tangar nüngdak bushia arua asenok dang nungi alitsüsa tangbo asenok ket nung kecha maka aser tangar bendangertem puatsüsa asen ket nung tesayutsüa kecha maka, anungji asenok orr reprangtsü aser alia bener arutsüba dak alaka, tang tangbo tangar asen limai aneti arutsü nüngdak mali kümogo. Ibaji kodang asenoki arokaroka bilemdangdir, tanüa asenoki temulung agüja inyak nungbo asen lima ya tangar aika asoshi Delhi aser Shillong ama kaketshisatsü anetdak, akhi ama, tesem tajung ka kümdaktsütetsüsa shisa tajung angutsü.

OLEMSABANG

Shirnok dang lenir tajung ta ajatsü ???

~ L.Kika Pongener.

Alima nung Tsüngremi nisung shia nem sempet (Talent) balala lemzükja lir, itum sempet-tem rongnung lenisüba (Leadership) sempet ya-a sempet tajungtiba rongnung ka asütsü. Iba lenisüba sempet ya nisung aika nembo lemzükja mali, oda nisung kar nem alakteta/shiteta lemzüktsüba sempet ka lir. Iba lenisüba sempet ya, nisungi pei sasa meranga yangludangba/shikaba kisung agi dangbo majungtsü, kechiyong iba sempet yabo azü (Blood) nungi senmangtepa arur.

Lokti-tentet ka tashi-ita, liromedema, longjema anir aotsübaji lenir dak tuluka keta lir. Atangji yimten-a suang, arogo-a suang, koba lokti-tentet sudir suang, lenir ka mejungra/tashi-meitra, mesura lenir kati pa teinyaktsü tim tashi (Powers and Functions) shitak mamshitetra, lokti-tentet kaji kodanga renloka tejakleni maotsü. Atangji, nuburi kanga nungita (Support) asüyongjia, lenir ka dak iba lenisüba sempet (Leadership Quality) keta melira, pa/lai lokti-tentet kaji timyimi anir mootetsü, saka meyiper teraksa/telemsa-ang adokdaksütsü.

Lenisüba sempet ya shisaliok jenjang tulu tonga azüingba (Educated & Qualified) kisung agi majangzüktsütsü, menden jenjang tulu (Positions) nung amenba agia majangzüktsütsü, mesura rongsen tulu akaba (Wealth & Rich) agia majangzüktsütsü. Anungji alima meima yimsusudaktsünura, mesura lokti-tentet ka tashi-ita/renloka tejakleni anir odaktsünura, yimsüsür/ lenir shimdang, kanga kümdanga shimtsüla. Lenir ka shimdang, tzükong-sanger, yimtsür-yimer, mepo-sanger, kin-kidong, meimteper/jungteper, pei sunutsü asütsüba, pei ajangzüktsüba apia meshimtsüla. Lenir kaji mangdang (Vision) tulu akaba asütsüla, shisatsü tangatetba tesadem (Wider scope) asütsüla, ochishir, shisatsü talang, taremsük, ajemalua tila kümtetba, tulu-tila ajak den liromedema litetba, tangar nungi shisatsü agitsü jangraba, temetongshitsüba agizüktsüba, tangar dang akümstüba, tangar züingshiba/züingokba nisung asütsüla.

Lenir ka dak nalok-nara/jaksa-jaklem/tiaksang, asüküm, mezü-meküm, konang-nungsang bushiba, pei sasa ulua bilemba, tanak-temesung, tulur-tilar, takar-sensaker bendanga amshiba, tejak repranga inyakba (Partiality) ibala jakla-yimya kheni malitsüla. Lenir ka dak ozü kin, par kin, ozü kidong, par kidong, ozü - onok ta bendanga amshiba (Ism) malitsüla.

(Maneni asüing adok nung angutsü...)

Arogoi aser Laishiri yamai Clean Election nung shilem agidaktsüner

I. Meyionen Jamir

(Yashi adok nungi...)

- 5). Kodang election campaign tatsükba tatsükba kümdir aser petsaprong tenzükdir, Arogo tenzükertem aser Laishirtemi yimdong süa procession aotsü. Iba mapang nung placard aser slogan item mesükba "Yimden yimsüsürji Tsüngremi dang shimteter," "Tsüngrem tsübuba lenir dang shimtsüla", "Tsüngrem atakatem tsübudi" etc. amshitsü akok.
- 6). Election Commission anema, alima temzüng ozüing melaba anema inyakbatemji tuteta sayutsüba Arogo aser Laishirtem mapaji asütsüla. Kokra 2022 tetenzüklen Ao Arogotem nung ABAMi anir Election dak sendakba sentep ka dang masü, saka Sermon Series asembe-pezüben sentep nung amangbapur nem tangatetba agütsütsü asoshi sendong atong nunga koda?

Tanü Election koda junga, merüka agitetsüba indang jembir. Aji saka Arogoi iba kija dak rangloker mapa inyakra ajibo kodanga tabensa masütsü. Anogo shia tamanger ka libaliruba nung ochi, temerük, jakla, yimya yimpong, asüngteta litetba, tatishitsü taküm khuli sayutetba tamanger ayaktem mali tashi tebilemstü lir. Sannükertem aser Tsüngrem tenzükertem pei santem mesütsü nungloktsüba mamatsüla, santem tenüing teta metetsüla, santem kong samadar metetsüla. Onok nütsüing nübur dang Tsüngrem O teratet sayuang. Pulpit nung noktaker tamangertem impress asütsü, entertain asütsü, mesüra Information aika bendena, illustration aika shialokti peladaktsütsü merangba nung mapang meindoktsüla. Saka tanela nung nüksü yima prokang. Nenok sayutsüing agi aiben tekulemi arurtem maleter, tzüra matemer, onok taginüba aser tanela chiyongtsü peria mangur. Nenoki sarasadem mesüi khuli asüba onoki meteter. Chisüing-onsüing tonglemshir agütsüba onoki meteter. Aji süaka nenok tia maka, nenok dang tasü ita ashir maliati. Tai tongloktsüteper masü saka arok külemi shisadangtsü aser inyakdaksünüba iba sabang ajanga lemsateper. Arogo ta asüba nung kecha tebandang mali asenok ajak tena lir. Tamangertem tamakok asoshi asenok ajaki sarasadema bilemdanger tajungtiba inyaksü Tsüngrem nungi tangatetba shisatsü meshidi.

Kechisarena tapu-meina ajak asenoki inyakdangtsü akok, saka asenok tamanger shiai Tsüngremji, asen temolung ajak agi, aser tanela ajak agi, aser asen mulungsentsü ajak agi, aser tashi ajak agi Kibuba Tsüngrem memeim tashiasenok tiyazü tamanger aser aseni merangba aser sangrasangchiba nung takok mangutsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria nung tamalen raksatsüba Tenla ki ka pastor kati yanglutsü



April 4, 2021 nü (Easter Sunday) Nigeria nung Benue State kübok Agatu Methodist Arogo Tenla ki tasenba semzükba sülen tekülem kidang New York City nungi Pastor, William Devlin-i tamangertem den tangokba noksa nung angur.

May 07, 2021: Küm pongu tejaklen Nigeria nung Fulani Muslim kiralongrartemi Tenla ki ka raksaja liasü saka America nunger pastor kati iba Tenla kiji tanaben yangluja Tenla ki tasenba nungi Easter Sunday (April 4, 2021) sentong agiogo.

New York City nung Pastor aser melungtet telok REDEEM nung CEO, William "P.B." Devlin aser US nung aliba Nigeria Law Group nungi lawyer, Emmanuel Ogebe na senteper Nigeria nung Benue State kübok Agatu nunger indang Tenka kiji tanaben yangluja liasü.

Küm pongu tejaklen Fulani Muslim kiralongrartemi Agatu nunger amakba mapang nung Methodist Arogo Tenla ki raksaja liasü.

Osangbener den interview ka nung jembidang Bronx nung aliba Infinity Bible Arogo nung missions pastor, Devlin-i, "Taneptsüba aser teimla; olong anaji onoki ajanghia inyakba olong tajung ana lir," ta ashi.

2016 küm February ita nung Fulani teloki Agatu Methodist Arogo Tenla ki rongdokja liasü; iba mapang nungi Arogo züngsem pongu tepset, Agatu nunger noklang aika tepset aser ki 70 dak tema raksaja liasü.

2020 küm October ita nung pastor, Devlin-i Agatu semdangba mapang nung pai

Arogo züngsemtem dang, "Tsüngrem dak tamang akaba aser Pa taochi, iba denji külemi Yisu Khrista dak teimla yur iba Tenla ki ya 2021 küm March ita nungbosa renemtsü, aser Yisu shia aruba anogo (April 4) nungbosa tekülem sentong agitetsü," ta metetdakja liasü.

Iba mapang nungi pastor-i Agatu nunger dang, "Asenok kanga benjungteptsü," ta shia liasü.

Yaküm October ita nung Devlin-i Nigeria semdangba mapang nung Fulani teloki raksatsüba Tenla ki kimong nungi napong chiyimya-a liasü, aser Tenla ki meliaka tamangertem moapu nungi tekülem sentong agia aru.

Devlin-i Arogo züngsemtem dang, "Tangbo iba tesem ya napong chiyimdak tesem ka dang kümogo, ajisüaka Tsüngremi iba tesem ya santem (tamangertem) chiyimba tesem ka kümdaktsü," ta shia liasü.

Devlin US-i meyipa aruba sülen Tenla ki sütsütsü atema US sen 30,000 bendentsü asoshi maparen tenzük, aser anogo ishika tsüngda US sen 15,000 dak tema bendentet.

Iba sülen-a pai Nigeria aiben semdangogo aser yaküm December ita nung Tenla ki yanglu tenzükba liasü.

Iba Tenla ki tesüdak mapang nung Arogo züngsem timba-

timba aküm aser Easter Sunday nü mezüng tekülem agiba sentong nung Tenla ki sünga nisung adenshi, ta pai metetdaktsü.

Tenla kidang nisung 500 dak tema adenshi aser Easter Sunday tekülem sentongji ghonda 5 dak tali agia liasü. Tekülem sentong nung ken aten, tsüngsang, sayutsüngi aser Tsüngrem nem tanurtem bendanga agütsüba sentongtem agia liasü.

Pai ashiba agi, iba Tenla ki semzüktsü atema Agatu nungeri Benue State Gov. Samuel Ortom, Methodist putir ka aser city council züngsemtem jaoka liasü.

2016 küm Fulani teloki Agatu nunger yim 17 amakba ajanga region nung Khristan shilem 60 shi jenshia liasü, ta Agatu Resource & Innovation Centre-i metetdaktsü.

Devlin-i ashiba agi, Egypt aser Sudan na nung Jihadist kiralongrartemi Tenla kitem amakba sülen Arogo aikati pa ajurua teyari meshia liasü.

Tamalen-a pastor Devlin-i US sen 100,000 saruteta Sri Lanka nung Zion Evangelical Arogo Tenla ki yangluja liasü. 2019 küm Easter Sunday nü kiralongrartemi Sri Lanka yimtiba, Colombo nung hotels aser Tenla ki ana amakba mapang nung Zion Evangelical Arogo Tenla ki-a raksaja liasü.

ANO GO ABEN TSÜNGREM DEN

Tsüngremi ajongli bushir Yerima

O Israel kidong, iba poteper amai ni ne den inyaktsü makok no? ta Kibubai ashir. Ajiang, poteper ket nung ajongli ama, yamaji nenok kü ket nung lir. Yerima 18:6

Ner kibong dangi, ne tembar dangi, ner telok dangi aser nenok lima dangi tekümtet bener arutsü Tsüngremi metetta lir. Aji oda shirnoki Pai amshidaktsütsü mulunga pei taküm yanglushitsü mulunga pei taküm yanglushitsü mulunga alir parnokji Pai bushir. Ajongli pa sasa pa atema kecha sentong mali, tenzüktsü kecha tejangraba mali mesüra tagütsüba mapa inyaktsü kecha nungnanga mali. Ibai ajongli ka dang. Yanglushitsü akokba, amshitetsüba ka dang, master nem bendanga agütsüba oset ka dang lir.

Mapang nung asenoki mulungsoa ashir: "Ni kü tashi, sempet metetogo aser tang ni tajungtiba nung na koda tenzüktsü!" Mapang kar nung asenok Pa nem osang agütsür, "Ni kü tashi maittem metetta lir, anungji ni Na asoshi mapa inyaktsü makok." Aji saka ibaji ajongli jaklaji masü. Asen tashi den mapa inyaktsü asoshi Tsüngremi asen tashi kecha latetta meyutsü (2 Kor. 12:9-10).

Pai aginüba ama Pai asenok yanglutsü akok. Kodang Tsüngremi nüngloktsüba mapa nung ajemaluba nüngdaker, Pai ajemaluba tenzükter bushir. Kodang Pa mapa nung tejangraba tashi Pai Pa Tanela agi süngtsütsü tejangraba tenzükter bushir. Tsüngremi temeshi marok amshiner, anungji shirnoki pei dak aliba memerükba merüktedaktsütsü mulunga alir Pai item nüburji amshir. Ajongli dang alitsüji tamaren mapa ka masü. Meyushitsü asoshi takoksang Tsüngremi bushiba dak alaka iba nung tebur ajungba aser tepuatsü kecha maket.

Tebu dang Pa asoshi nai kechi inyaktsü akok aser kechi inyaktsü makok ta Tebu dang ashitsü ne tebilemba lira, Pai bilemba au ta agizükang aser Pai na koma yangluner yanglutsü Pa dang melaang. Ajongli ama. Po ateper na, ni ajongli. Ni bendanga agüja atar ta shiang.

Yaküm Bethany Christian Services-i tanur 190,000 dak tema yariogo

May 07, 2021: May 03, 2021 nü Bethany Christian Services-i 2020 küm parnoki inyaka aruba osang tejangja metetdaktsü, aser iba report nungi parnoki 2020 küm alima tesem balala nung parnoki tanur 190,000 dak tema yariiba indang shia lir.

Yaküm Bethany Christian Services-i 2020 alima tesem balala nung tanur 191,641 yaria liasü, aser US kija nung parnoki tanur 114,836 yariogo.

Bethany CEO aser Tir, Chris Palusky-i, "Ozü organization-i Yisu Khrista dak aliba temeim sayua 2020 küm sensaker kibongtem aser tanurtem aika nungita yariogo," ta metetdaktsü.

"Tang alima nung tanur million 140 shi talidak maka, iba denji külemi coronavirus wara aliba agi akokba tashi tekaraba nung tanurtemji yaritsü nüngdaka liasü. Bethany-i maneni tanurtem nem teküzmükba agütsüba aser temeim sayuba ajanga alima nung temelenshi adokdaktsütsü," ta paisa metetdaktsü.

"2019 küm Global Family Preservation & Empowerment programs ajanga nisung shilem 27.9 agi timba kongshi, US nung Family Preservation shilem 17.5 agi timba aküm, Foster Care Support & Training shilem 44.2 agi timba inyak aser Post-Placement Support for U.S. Adoptive Families Permanency Supports shilem 27.9 agi timba aküm," ta Bethany telokisa metetdaktsü.

Safe Families for Children program kübok nüngdakba kibongtem aser tanurtem nem

teyari agütsür, aser yaküm parnoki kibong 5,725 yaria liasü.

Domestic Programs Senior Vice President, Cheri Williams-i, "Item züngya ya ajanga Tsüngremi yangluba aser meimba nisungtem lir. 2020 küm tayongzükba jenti liasü, aser iba mapang nung ozü staff temi kanga meranga inyakba ajanga timtemer kibongtem aser tanurtem jenti yariiba atema pelar," ta metetdaktsü.

"Bethany teloki sentong tuluba-tuluba atemzükba inyakba ajanga US aser alima tesem balala nung kibongtem tashi itdaktsür, wazüka ayur aser tashi agütsür," ta Williams-i metetdaktsü.

US dak alia alima tesem balala nung Bethany Christian Services-i nisung 64,408 yariiba den külemi refugees aser linük balala nungi jenshia US nung jenoka alir 12,397 yariogo.

Global, Refugee & Immigrant Services Senior Vice President, Tawnya Brown-i, "Yaküm onoki tenzükba aruba tanurtem, tetsürtem aser teburtemi tebang agi mejembitetba timtem aika ajanghia liasü. Iba ama tensa ka nung Bethany-i Yisu Khrista temeim sayuba mission maneni takok ngua inyakogo. Nisungtem tenzüktsü atema Tsüngremi onok jatet anungji kechi tensa ajurudir ajuruaka onoki maneni tamang agi inyaktsü," ta ashi.

Bethany Christian Services ya melungtet telok ka lir, aser iba organization-i tesüba küm 75 dak tema alima nung timtemer kibongtem yariiba den külemi lokti tenzükba arudar.



Covid wara ajanga Mumbai nung tanaben Tenla kitem shibangaka Arogotemi maneni timtemertem nem chiyungtsü lema agütsüba noksa nung angur.

OLONG PAITEP # 5805


1	2					3			4	
5			6						7	
8					9				10	
			11							
12	13							14		15
					16					
17									18	
19										20

- TIPIEN**
1. Senzütü lenmang tasak - 5
 2. Tanüla - 5
 3. Tzü meyok - 4
 4. O jembiba yimya - 3
 5. Inyaktet - 4
 6. Ninang tesashi ka - 4
 7. Maginü - 5
 8. Aou agi yangluba tzü - 4
 9. Benden - 4
 10. Shilang - 3
 11. Teloktep/külemi - 4
 12. Tzü mali aküm - 5
 13. Jenjang tulu - 5
- LANGTSÜNGLEN**
1. Tenarong majung - 5
 2. Sen meshir agütsü - 4
 3. _____ Shiruru - 5
 4. Ta-aktsü mapa - 5
 5. Mesük - 3
 6. Mamatzü agütsüba shiruru ka - 5
 7. Komo temaitsü - 5
 8. Apitet - 5
 9. Shiruru aputsü ayuba - 4

OLONG PAITEP # 5804 TELANGZÜBA

- TIPIEN :**
1. Temeshi, 5. Imo, 7. Lemtet, 9. Onü, 10. Makang, 11. Kin, 14. Tia, 16. Tatsük, 18. Aso, 19. Mojing, 22. Ako, 23. Poknung.
- LANGTSÜNGLEN :**
1. Temlok, 2. Miim, 3. Sünem, 4. Ita, 6. Mangi, 8. Taküm, 9. Ont, 12. Itsük, 13. Nao, 15. Angang, 17. Kotak, 20. Ipru, 21. Lep.

Noksa nung meputepi aliba 10 bushiang



TANÜBO NAI LANGZÜANG

Q. Paul Allen ya _____ indang co-founder liasü
 A. Microsoft B. Google
 C. Facebook D. Instagram


_____ (Taruba adok nung onoki langzütü)

YASHI ADOK TELANGZÜBA : 1959

AO OSHI ANGAZÜKDAK:
TANÜ ANGAZÜKTSÜBA OJANG

Entsü
 (n) Ozüsangnu aser per ama shirurutemi techanu rizüksü atema akuba telonglong oset (egg)
 * Anogo shia asenok ajaki entsü kakabo achitsüla.

Enshi
 (v) Tzü mashimashi endokba (splash)
 * Lai tzü atem sünga enshi




Tir Yimyim

Happy Birthday

Tenüing : Sentishi Imchen
 Talidak : Dimapur
 Tasoba Anogo : May 7, 2020.

Tsüngremi onok nem jabaso Sentishi agutsüba atema kanga pelar aser ano maneni pa taküm moajangma.

- Temeim tsürabur aser kinungertem.



NAI-A YA METETTER MA?



SUDOKU # 5849 TELANGZÜBA # 5848

1	6	8				7	9	3	2	1	5	6	4	8
				4	6	1	8	1	5	7	6	4	2	9
3	4		7				6	4	2	8	9	3	5	7
			1				4	8	9	5	7	6	3	1
	1	9	6		5		3	5	7	4	2	1	9	8
7					9		2	6	1	3	8	9	4	5
9				1	3		9	2	6	1	5	7	8	3
1			9	5			1	3	8	9	4	2	7	6
			5	2	7	9	5	7	4	6	3	8	1	2

OJANG LUTEP # 5391

TÜNEGRSM	:							
DKA	:							
AAALK	:							
MAALI	:							
NNGU	:							
NSBEAAA	:							
EETTBAM	:							
NNGIUS	:							
SNGHIA	:							
AAKM	:							

OJANG LUTEP TELANGZÜBA # 5390

**LOKTI MAPA NUNG KISÜNG MESÜI SHISA
 OPANG LEMSATEPA INYAK TAJUNGBA**

TAN HOPTA ATEMA - KOMA SÜLA ?

Q. Asen lima nunga Covid-19 tashidak wara agi amokmeren tialong nung assembly election agi nunga koma süla ?

Stalin-i Tamil Nadu CM tenangzükba agi PARTY-I NANGZÜKBA INYAKER



May 07, 2021 nü Raj Bhavan, Chennai nung Tamil Nadu Angh, Banwarilal Purohit-i ketdangsia DMK Tir, M.K Stalin nem Tamil Nadu Chief Minister inyaksü atema tenangzükba agidaksü dang tangokba noksa nung angur.

Chennai, May 07 (Agencies): Hokolbarnü Chennai nung DMK tongti lenir, M.K. Stalin-i Tamil Nadu Chief Minister inyaksü atema tenangzükba agiba sülen ghonda ishika tsüngda pai election mapang nung nangzükba ama inyaksü atema file ishika sign süogo; pa den Gandhi aser Nehru natia cabinet minister inyaksü atema tenangzükba agiogo.

Tiruchy menden nungi takok angusang, K.N. Nehru nem Urban Development & Municipal Administration Ministry agütsütsü aser Ranipet menden nungi takok angusang, R. Gandhi nem Khadi & Rural Employment Ministry lemzüksüogo.

Chief Minister inyaksü atema tenangzükba agiba mapang nung arrshi küm 68, Stalin-i tang mezüng tebu nüngtem nung "Ni, Muthuvel Karunanidhi Stalin" ta ashi.

Taoba mapangtem nungbo pai "Ni, M.K. Stalin" ta dang jembia liasü.

Mapang talangka nungi DMK aser Stalin nungiterem nem Cabinet menden lemzüksü, iba dak alia taoba mapang AIADMK nungi minister inyaker tema kar nem cabinet lemzüksüogo.

Chief Minister tenangzükba agiba sülen ghonda ishika tsüngda M K Stalin-i election mapang nung nübürtem dang nangzükba ama inyaksü atema file pongu nung sign asü.

Election mapang nangzükba ama inyaksü atema Stalin-i ration card holders ajak nem sen 4,000 agütsütsü, jila nung tetsürtem bus nung angati senzüdaksütsü, Aavin mamatzü litre nung sen 3 ajemtsü aser nija hospital nung Covid treatment agiba atema sorkari sen agütsütsü tuyu.

Assembly Election atema

nüböyimba mapang nung Stalin-i, par party-i takok ngura pa chief minister akümba sülen mezüngbuba anogo 100 tsüngda item tenangzükba mapa küma inyaksü, ta nübürtem dang nangzükba liasü.

Honibarnü CM tenangzükba agiba sentong nung taoba Chief Minister Edappadi K. Palaniswami bo maden, kechiyong pa tawa surgery agiba sülen doctor temi pa dang anisüngzüksü tuyua liasü. Ajisüaka AIADMK nungi taoba mapang Deputy Chief Minister, O. Panneerselvam bo sentong nung denogo.

Iba sentong nung tejaokertem rongnung Tamil Nadu Congress in-charge, Dinesh Gundu Rao, state Congress Tir, K.S. Alagiri, MNM lenir, Kamal Haasan, BJP lenir, L. Ganesan aser DMK atema election asalentong yanglutsür, Prashant Kishore nung dena liasü.

N Rangasamy-i Puducherry CM tenangzükba agiogo



May 07, 2021 nü Puducherry nung All India NR Congress (AINRC) lenir, N Rangasamy-i Chief Minister inyaksü atema tenangzükba agiba sülen Lt Governor, Dr Tamilsai Soundararajan den külemi tangokba noksa nung angur.

Puducherry, May 07 (Agencies): Hokolbarnü Puducherry nung All India NR Congress (AINRC) party tongti, N Rangasamy-i Union Territory of Puducherry Chief Minister inyaksü atema tenangzükba agiogo, saka tang wara aliba agi sentongji kanga tongmelang agi dang agi.

nung tawa election nung takok angur MLA tem, party lenirtem aser sorkar tongti ketdangsertem ang aden.

Rajniwas nung Lt Governor, Tamilsai Soundararajan-i ketdangsia arrshi küm 71, Rangasamy nem Chief Minister tenangzükba agidaksü. Anogo ishika lir ang BJP densema aliba teloktep nungi

cabinet minister tema tenangzükba agitsü.

Puducherry nung Chief Minister densema minister timba agia 6 dang asütsü, ajisüaka tanbo Deputy Chief Minister menden-a alitsü, aser Dy. CM ji taküm January ita nung Congress party toktsür BJP nung adensang, A Namassivayam shimtsü, ta osang angazüker.

Tawa agiba assembly election nung AINRC-i menden 16 nungi toktep aser menden 10 nung takok angu, ano BJP-ia menden 9 nungi toktepa menden 6 nung takok ngua liasü.

Puducherry UT nung Assembly menden 30 lir aser sorkar akümsü atema tajemba agi menden 16 bosa nüngdaker.

Puducherry nungsa Independent candidate troki takok angu, DMK-i menden 6 angu aser Congress-i menden ana nungdang takok ngua liasü.

India nung ano nisung lakh 4.14 dak Covid putet aser 3,915 asü

New Delhi, May 07 (Agencies): Hokolbarnü India nung ano nisung lakh 4.14 dak coronavirus putetba sülen tang tashi nung coronavirus case ajak agibo crore 2.15 jungogo; tesüiba ghonda 24 tsüngda iba tashidak agi nisung 3,915 asüba sülen linük nung iba tashidak agi asür ajak agibo lakh 2.34 jungogo, ta Honibarnü Union health ministry data ajanga metetdaksü.

Tesüiba anogo ka tsüngda India nung nisung 4,14,188 dak coronavirus putet aser tang tashi nung linük nung nisung ajak agi 2,14,91,598 dak iba tashidak putetogo.

Tesüiba anogo 10 tashi anogo shia linük nung iba tashidak agi nisung 3,000 dak

tema asür aser ibaji lemsara anogo shia nisung 36,110 asüba den kasa lir; ibaji linük nung coronavirus tashidak agi shirangertem ghonda shia 150 asüba den saku.

Tang India nung coronavirus tashidak agi teshirangdakpur 36,45,164 kümogo aser ibaji coronavirus caseload nungi shilem 16.96 lir. Iba tashidak agi shiranger 1,76,12,351 anepogo aser iba tashidak agi shiranger asüba shilembo 1.09 dang kümogo.

Hokolbarnep ICMR-i ashiba agi, May 6 tashi nung samples ajak agi 29,86,01,699 tendangogo aser iba nungji Brihostibarnü samples 18,26,490 tendangba densema lir.



Mumbai (Maharashtra), May 07, 2021: Hokolbarnü Thane district nung aliba chemical factory ka arongba noksa nung angur.

May 8 nü PM Modi-i European Council senden nung shilem agitsü

New Delhi, May 07 (Agencies): May 8, 2021 nü India Ato kilonser, Narendra Modi-i European Council senden nung shilem agia adentsü; iba senden nung tetushi tejaoker ka ama shilem agitsü atema European Council Tir, Charles Michel-i Modi jaoka liasü, ta Brihostibarnü Ministry of External Affairs (MEA)-i metetdaksü.

India-EU lenirtem sendenji Portugal Ato kilonser, Antonio Costa leniba nung agitsü.

MEA-i sangdong ka ajanga, iba senden nung EU züngsem linük 27 nungi tongti lenirtem den külemi Ato kilonseri shilem agitsü, ta metetdaksü.

"Lenirtemi coronavirus wara aser healthcare tsütsü amalitepa inyaksü atema jembitsü; lenla ajak nung terenlok alitsü, India-EU rongsenkettsüng partnership aser regional den alima nung teblemtsü onük balala atema o lemteptsü," ta MEA-i metetdaksü.

"India-EU lenirtem senden nung EU züngsem linüktem nungi lenirtem den jembitsü atema maongka angutsü. Iba ya yimtenren tsütsü alizüng ka tongtetba lir, aser iba ya ajanga 2020 küm July ita nung 15buba India-EU senden amenba mapang nungi tenzüka tesendaktep tajungba akümba kuli sayur," ta MEA-isa metetdaksü.

Asenoki Covid 'wave' tasembuba nokdangtetsü: K Vijay Raghavan

New Delhi, Monupii/May 07 (Agencies): Hokolbarnü India sorkari, asenoki mera takang agia inyakra aser wara anema tetuyubatem shidak beshira coronavirus 'wave' tasembuba nokdangtetsü, ta metetdaksü.

Osangbenertem senden ka nung jembidang Principal scientific advisor, K Vijay Raghavan-i, "Asenoki mera takang agia inyakra tesem kecha nunga iba wara

tasembenbuba meproksü. Wara tasembenbuba prokba nokdangtsü atema state tem, districts aser yimtem aser tesem ajaklen tetuyubatem shidak beshitsüla," ta pai metetdaksü.

Anogo ana tejaklenbo pai, "Wara tasembenbuba proktsü saka koba mapang nung proktsüar mejangja. Asenoki iba atemaji renema alitsüla," ta jembia liasü.

Japan nung State of Emergency atsülangtsü

Tokyo, Monupii/May 07 (Agencies): Tokyo Olympics tenzüksü ita ishika lia Japan sorkari novel coronavirus cases tali jatetba azüoktsü mechi Hokulbarnü nungi tenzüka Tokyo aser danga tesem asem nung state of emergency hopta asem atsülanga May tatem tashi alitsü.

State of emergency tatsü aser tashi tait ka benokba ajanga iba tashidak wara menatepa aoba wave pezübuba azüoktetsü amai sorkari amanger, saka linük yimtiba, Tokyo aser Osaka yimti nung cases tasen onsara lir, ta economy minister Yasutoshi Nishimura-i ashi.

State of emergency ya May 11 tashi liasü aser May 31 tashi atsülangtsüba ajanga July 23 nü Olympics tenzüksü lia tetsüngta ita ana majung yutsür, koba tashidak wara mechi taoba küm thinena liasü.

"Osaka nung tensa kanga mejungi lir aser yangji putetba COVID-19 tashidak tabu ya kanga kera prokshia aor. Osaka ama yakta Tokyo nunga tensa mejungi akumtsü ama bilemer," ta Nishimura-i Hokulbarnü medical aser economic expert senden ka nung ashi.

Parnok state of emergency atsülangtsü molunga agizük, ta Nishimura-i ashi. Sorkari iba sentong agizüktsü renema lir aser Ato Kilonser Yoshihide Suga-i nikongdang 7:00 ako nung osangbener senden nung iba indang jembitsü.

Osaka nung aliba mozüki

ajunga nung kanga mejungi shiranger atema yangluba yipten ajak agimaogo, ta public broadcaster NHK ajanga Hokulbarnü ashi.

Japan nung novel coronavirus cases 618,197 jangjateta lir aser nisung 10,585 shi COVID-19 agi süogo, ta sorkari ashir.

Tokyo anüolen tsütsü Aichi prefecture aser southwest tsütsü Fukuoka prefecture ya Tokyo aser Osaka, Hyogo aser Kyoto prefecture tem den külemi state of emergency küboki aittsü, ta Nishimura-i ashi.

North tsütsü Hokkaido asetkong aser danga tesem ana "quasi state of emergency" küboki aittsü, ta pai ashi.

State of emergency atsülangba kübok bar, restaurant, karaoke parlours aser danga tesemtem nung alcohol ayokdak maneni alcohol agütsüba anena atatsü ashitsü, aser nüburttem dang maneni tongtipang masüba nung senzüsempung masütsü ashitsü.

Ajisüaka danga talenbatem salatsü, ta Nishimura-i ashi. Shopping mall amala jungjunga meshibangi mapang tatsüba lapoktsü ashitsü, ajisüaka Tokyo aser Osaka nungo par sasa telemtetba agitsü.

Japan ya danga linüktem amabo iba virus agi timtem magütsü, saka mozü agütsüba maparen kanga menur aser teintet rogotema aika ano tang tashi mozü magi atatepa lir.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA NOTIFICATION

NO.DTE/EXAM/2020-21: In continuation to the earlier notification of this office even number dated 13th April 2021, the last date of filled application for undergoing DIPLOMA Engineering courses within Nagaland is hereby extended till 31st May 2021.

Application form can be downloaded from the Department website at <http://www.dtenagaland.org.in>, in which case the fee of Rs. 300/- (Rupees Three hundred) only may be deposited while submitting the form.

S. No	Name of Polytechnic	Course Offered	Seats	Brief of Government Polytechnics
1	Khelhoshe Polytechnic, Atoizu	Civil Engineering	60	1. Ideally located for study environment with qualified faculty. 2. AICTE, New Delhi approved Institutions. 3. Quality technical education through hands on practical classes, entrepreneurship and industrial trainings. 24 hours power backup facility. 4. Pursuing NBA accreditation. 5. State of the Art Laboratories with smart classrooms and internet. 6. Hostels and Bus available. 7. Scholarship State as well as Central Scheme. 8. State and National activities: seminars, workshop, sports, Techfest. 9. Online and offline admission and classes. 10. Pass out students working in State and Central Government Offices, Private Companies and self- Entrepreneurs, higher studies through lateral entry.
		Mechanical Engineering	30	
		Electrical & Electronics Engineering	30	
		Automobile Engineering	30	
2	Institute of Communication & Information Technology, Mokokchung	Computer Engineering	15	
		Electronics & Communication Engineering	15	
3	Government Polytechnic, Seithekema 'C' Dimapur	Civil Engineering	27	
4	Government Polytechnic, Sedem, Tuensang	Civil Engineering	30	
5	Government Polytechnic, Tsunazho, Chetheba, Phek	Electrical & Electronics Engineering	30	
6	Government Polytechnic, Aboi, Mon	Civil Engineering	30	
7	Government Polytechnic, Doyang, Wokha	Architecture Engineering	30	
8	Government Polytechnic, Peren	Interior Designing	30	
9	Government Polytechnic, Kohima	Civil Engineering	30	
		Computer Science & Engineering	30	
		Fashion Design & Apparel Production (FDAP)	30	

Seats:

- 1) 15% reservation shall be made for Backward Tribes on the basis of One Tribe One Seat.
- 2) 85% seats for ST Indigenous of Nagaland for Civil Engineering course.
- 3) 75% seats for ST Indigenous of Nagaland and 10% of seats will be reserved for General category (within & outside the State) against the remaining programs.
- 4) 5% reservation for PWDs candidates from the above seats of S.no 1 and 2.
- 5) 10% reservation for women candidates from the above seats of S.no 1 and 2.

Eligibility Criteria:

Engineering Course: HSLC/10+ passed with minimum aggregate of 45% with Maths & Science/DEE
FDAP Course : HSSLC/12+ Passed with minimum aggregate of 40%

(NUNGSANGMENLA IMCHEN)
Ex-Officio Director

Issued by DIPR

Rio de Janeiro nung police temi nisung 25 tepset

Rio de Janeiro, Monupii/May 07 (Agencies): Rio de Janeiro nung makamaiter timtiba aliba tesem kati temesepba miim mozü shibelener dak tenük yoker police noklang aika prangbong-injang bener aita nisung tajemba agi 25 tepset.

Brehostibarnep North Zone indang Jacarezinho favela nung prangbong bena alir lanur trok kilem-ma nung jokshishia senzüba video nguogo aser parnok kolakdang bulletproof helicopter tem yimzua liasü.

Temolung melemteti aliba mapa tamajung inyakertem police dang nungi jena aotsü meranger, ta osang ajanga ashi. Metro nung mena alir nisung ana dak injang agi khashi aser police ka asü.

Yangji alirtemi osangbener dang video aser noksa sayuba nung grenade apokba aser ki o ki tetsüngta nung nisung tasümgang laoa aliba, nisung telidak ki kar indang kishi nung injang agi tepok adoka akhaba, azü melanga aliba aben-süoshi aser staircase nungi azü yima alua aliba nguogo.

Ibai tim nung temesepba miim mozü shibelener aser danga mapa tamajung inyaker anema apusoba mapa lir, ta Brazil media aser Rio indang Civil and Federal Police forces temi ashi.

Saka human rights activist,



yangji alirtem aser public security specialist tem kanga aoksa aser danga tensa kar ajanga amaktsü ajungmeso südi, ta ashir.

"Kü takum nung iba ama police operation kodanga mongudang," ta Rio nung aliba Centre for Studies on Public Security and Citizenship nung research agir Bruno Soares-i osangbener dang ashi.

"Police officer ya anepdang 9:00 matongdang tepset, aser iba yongji police timba arua nisung aika tepset südi," ta Soares-i ashi, shiba Jacarezinho favela nung soa inet.

Hokulbarnü United Nations ajanga iba tatalokba bushisüngdangtsü ajungshio.

"Alima ajunga nung amshiba yimya nung iba tatalokba kanga junga aser shinga bukuma mesüi bushisüngdangtsü ajungshir,"

ta UN indang rights office odongtar Ravina Shamdasani-i ashi.

"Kangasa nungdakba mapang aser nisung takum asoshi lendong lir ta tejangja metetba mapang dang sepai tashi amshitsü Brazil ketdangsur dang nenshia ashir," ta Shamdasani-i ashi.

Soares, shiba operation agiba mapang favela nung liasü, pai ashiba agi, iba operation nung asür ajak ya mapa tamajung inyaker kisüngbo masütsü.

Police temi nisung tepsetba indang osang ano mesangdongi lir, saka yangji alirtemi ashiba agi, aser ya timba khatepba mapang asüba masü.

"Nisung kati ozü kidang atsüksü asüngdang. Police aruba mapang nisung kar yangi liasü ta ni ashi, kechiaser parnok aitsübasia liasü. Parnok ozü jala

mejangba takdangi ai aser pa idangjisa khaset. Tang kü jala komaser yangji mejangtsü?" ta favela nung alir kati ashi.

Taoba küm Brazil indang Supreme Court ajanga police dang COVID-19 tashidak wara mechi operation anena atatsü shia liasü.

Supreme Court ajanga tenokdangba agütsüba sülen police operation nung nisung asüba ya taoba mapang dang shilem 70 agi tajemba akum, ta Rio nung aliba Federal Fluminense University ajanga bushitet. Saka taoba küm October ita Claudio Castro-i Rio indang Governor office nung amenba sülen nisung asüba tenzü.

Brehostibarnü operation agiba indang ya linük nung tematiba court ajanga osang kecha sangdonga mali.

Operation agitsü ghonda 24 lia police temi Public Ministry nungi temelaba agitsüla, ta

court ajanga shia lir.

Public Ministry ajanga iba operation agitsü mela, ta osangtem ajanga ashir. Saka Centre for Studies on Public Security and Citizenship nungi Soares-i ashiba agi, operation tenzüksü ghonda asem dang lia ministry nem iba osang sangoktsü.

Taoba küm Rio police ajanga nisung 1,200 dak tema tepset, ta Human Rights Watch ajanga ashir. Asürtem ya timba makamaiter aser lower-class tem aliba tesem nungi lir.

Rio nung prangbong balala amshia azüdokshiba asadanger Fogo Cruzado ajanga ashiba agi, taoba küm pongu tsüngta tanur 100 dak tema 'stray bullets' agi takum samatsüogo aser iba ama mapa inyaker timba memerenshi.

"Tanep atalokba ama Rio de Janeiro nung operation ya teti ataloker. Police temi ki mita oa amakba ya yimya ka amai züngshir," ta Fogo Cruzado tentetsang Cecilia Oliveira-i osangbener dang ashi.

Police temi azüdokshiba ya Public Ministry ajanga aiben bushisüngdang masür, anungji police tem tarendakba mali. Police kisüngi inyaker masü, anungji sorkar aser Public Ministry tai lir, ta Oliveira-i ashi.

Skoda indang 'Fabia' model sayaogo



Company-i Fabia model ya 1.5 TSI four-cylinder motor densema engine option pungo nung agütsüsü. Iba gari engine ajanga 148bhp agütsür. Gari engine nung cylinder technique tasen ajanga totzü ajema atsüker aser CO2 tajemba adokdaksür.

Tanga engine variant nung 1.0 litre, three-cylinder TSI EVO engine - power option ana - 94BHP aser 109 BHP nung angutsü. Ano külen, 1.0 litre three-cylinder MPI EVO motor ya 64 BHP aser 79BHP power option nung angutsü.

Gari telung nung LED ambient lighting inoktsüogo. Iba LED yagi gari tejaklen dashboard nung temerem mesüra temesung sentsü adokdaksür. Iba den külemi, gari nung optional digital instrument cluster ka angutsü, koba 10.25-inch digital display alitsü.

New Delhi, Monupii/May 07, 2021 (Agencies): Czech Republic nung amenoka aliba Skoda company-i kanga dang yongya ataba 'Fabia' model sayaogo. Iba gari ya nungtugu Fabia model indang generation pezübuba alitsü aser gari nung avant-garde safety aser technology tasen dena lir.

Standard model dak alaka, iba fourth generation Fabia ya Combi Clever, Combi Monte Carlo, Black Edition Combi

Scoutline Clever, Monte Carlo aser Combi sentsü nung angutsü.

Fabia model tasenba ya trim asem - Style, Ambition aser Active nung agütsüsü. Iba gari ya Volkswagen indang MQB-AO sabang nung amendaker yangluogo.

Gari indang steering wheel ya three-spoke style nung angutsü aser Skoda-i gari nung heated windscreen inoksema yanglutsüogo.

Actor Sharan alima nungi pilaogo

Mumbai, Monupii/May 07, 2021 (Agencies): Malayalam film aser TV actor Sharan süogo. Pa arishi küm 49 liasü.

Tesüiba anogo ishika nungi Sharan ya temang meta shirang aser aoksa dang pa süja oadok. Idangjisa, pa aritepa mozüki anir ao, saka doctor temi pa taküm meküzmüktet.

Sharan May 05, 2021 (Bodhbarnü) asü. Film aser TV serial aika nung Sharan-i dubbing artiste ka ama inyaka liasü. Chithram film nung pai Mohanlal'er tembar shilem agiba ajaki jangjaa lir.



Sharan anojungi iba akümüli nungi pila aoba osang angashia Malayalam film industry aoksar. Mohanlal-i Facebook sabang ajanga mangyim tejashi den külemi tena tangokba noksa lemsatepa liasü.

Film nung Sharan den külemi tangokba noksa kar Mohanlal-i lemsatep aser pai asür Sharan-i toktsür aoba adianu/kinungertem den asükhü lemsatepogo.

Actress Ranjini, shibai Chithram nung tongti shilem agiogo, lai, "Kü adianu ka ama liasü aser na iba akümüli nungi pila aoba ya kü temulungi magizükteter, Saran Swarachithra, Chithram nung nai shilem agiba kodanga mamadoktsü. Tesünep nung anisüngzükanama," ta lemsatep.

Pelaba Lemsateper

"Onok tasü ita dang alir. Onoki iba ali temang nungi pilar Kibuba den kidang alitsü-ang onoki aginür" (2 Korint 5:8)

Asür **Wb. Imlionen** shirangba anogo nungi tasüba anogo tashi nung kija kibong shirnoki ozü kibong den nübu, rongsen, sarasadem agi yaritepogo nenok ajak dang tepang agi meshitetba tepela lemsateper. Tsüngremi nenok temeim mapa tajung den sarasadem teyari tulu asoshi moajangma.

~ Temeim kinungtsü, chirnur aser kinungertem.



ASÜ : 03/05/2021

Mulungnen O



Wb. Longernungba (Nükshiyim) 13:05:1951 - 03:05:2021.

Kodanga amatsü makokba ozü temeim tsürabur Wb. Longernungba shiranga aliba mapang nungi pa May 03, 2021 anogo nung iba lima nungi pilaa orr, onok mangyim jashi nung aliba mapang kija - kibong, yimten, lokti aser arogo nungi shirnokisa ozü dang meima nübo, rongsen aser sarasadem agi nungita yariogo, nenok ajak dang onoki kanga pelaba metetdaksür.

Onoki nenok tsüngdong arua pelaba meshitetba atema sasar, ajisüaka asen Tulusang Tsüngremi nenok temeim mapa asoshi talubosa moajangma ta ozü sarasadem.

~ Temeim kinungtsü, chirnur aser kinungertem.

Office of the Dimapur Molungkimong Senso Telungjem

TENÜNGSANG AGÜTSÜR



Wt. Kilangnaro, (Dr. Temsummeren Retd. Director, Department of Veterinary & Animal Husbandry, Nagaland kinungtsü) Taxation Department, Government of Nagaland kübok Additional Commissioner of State Taxes menden tongtetba atema, Dimapur Molungkimong Senso Telungjem-i la nem tenüngsang agütsür.

Tarutsü nunga la nem anema aliba moajang aser maneni takok tajung ngudakjang ta Dimapur Molungkimong Senso Telungjem-i sarasademtsür.

Sd/- (T. Nungshi Tzudir) President, DMST

Sd/- (S. Maong Longchar) Secretary, DMST

Kohima police-i yi apu



number NL-10 7922 aketba Scorpio gari tanak ka nung ozüng alema belenba yi (IMFL) case 27 apu, ta PRO DEF Kohima sangdong ka ajanga metetdaksü.

Police-i gari anisang aser pa den külemi mena alisang - Vijay Prasad (27) aser Abeto Aye (36) na apu aser tena den külemi Sorkar gari

Kohima, Monupii/May 07, 2021 (TYO): Hokolbar (07.05.2021) anepdang 11:00 ako meta Peducha tesem nung Kohima Police indang Highway Patrol Party-i registration

ya puogo. Iba maparen dak sendakba nung maneni bushisüngdangtsü atema Sechü (Zubza) Police Station nung ken o ka benokogo, ta kasa sangdong nung shia lir.

NAGALAND STATE e-GOVERNANCE SOCIETY (NSeGS)
DEPARTMENT OF INFORMATION TECHNOLOGY AND COMMUNICATION
 Nagaland: Kohima 797001
 No. NSeGS/Gen-5/2013 Vol-II(Pt) Dated Kohima, 6th May, 2021
NOTICE INVITING e-TENDER

The Nagaland State e-Governance Society (NSeGS), Department of Information Technology & Communication invites proposals from reputed firms for Cyber Security Audit of Nagaland Department websites hosted in the Nagaland State Data Centre. The proposal is required to be submitted online on e-tendering mode on the State Public Procurement Portal - www.nagalandtenders.gov.in. Interested bidders are requested to download the e-tender documents from https://www.nagaland.gov.in and submit their bids online.

Important dates :

Event	Date – Deadline
Release of RFP	06-05-2021
Last date to receive Prebid queries	13-05-2021
Date of Prebid meeting	17-05-2021
Last date and time for submission of bids	20-05-2021, 15:00 Hrs
Technical/Financial Bid opening	21-05-2021
Submission of Security Deposit	20-05-2021

Sd/- (Tongtiliba Longkumer) Member Secretary, NSeGS & Director, IT&C

Issued by DIPR

NAGALAND STATE e-GOVERNANCE SOCIETY (NSeGS)
DEPARTMENT OF INFORMATION TECHNOLOGY AND COMMUNICATION
 (Below New Secretariat) Thizama Road
 NAGALAND: KOHIMA
 No. NSeGS/eTender-2/2021 Dated 06th May 2021
NOTICE INVITING TENDER

The Nagaland State e-Governance Society (NSeGS) invites tender for Supply of IT and Network Equipments from IT empanelled Firms under the Department of Information Technology & Communication, Government of Nagaland.

The detailed tender documents can be viewed / downloaded from the following website, from 07/05/2021 10:00 Hours (Server Time) to 21/05/2021, 14:00 Hours (Server Time):

- www.nagalandtenders.gov.in
- www.nagaland.gov.in

Amendments/Corrigendum, if any will be hosted on the above website.

Sd/- (Er. Tongtiliba Longkumer) Member Secretary, NSeGS & Director, IT&C

Issued by DIPR

Nadal aser Osaka nati temaba award angu



Seville, Monupii/May 07, 2021 (Agencies): Taküm 'Laureus Sports Awards' sentong nung tennis asayar Rafael Nadal aser Naomi Osaka nati Sportsman aser Sportswoman of the Year Award takok nguogo. Kasa mapang football star Mo Salah aser Formula One world champion Lewis Hamilton napronglai Laureus Sports Award agizükogo.

World no 2 Nadal-i Laureus award pezübuba takok angur alitsü. 13buba French Open takok anguba den tongtibang asayamung nung Grand Slam title 20buba akokba ajanga pai iba Award angu.

Osaka, shibai US Open tanabenbuba koka aser Grand Slam title pezü nguogo, lai

Laureus award anabenbuba takok angur alitsü.

"French Open takok ngua aser Roger Federer indang Grand Slam title 20buba menepa ya kodanga mamadoktsü," ta Nadal-i ashi.

UEFA Champions League aser Bundesliga takok angur telok Bayern Munich-i Laureus World Team of the Year Award angu.

Liverpool aser Egypt nungi football asayar takotet, Salah-i pa alidak Nagrig densema tesem balala nung charity mapa inyakba atema pai 'Sporting Inspiration Award' nguogo.

Middle East nung tetsür temeden mapatong nung Salah ya tasüita jembir/nokdaker nübu ka lir.

2021 LAUREUS SPORTS AWARDS

Kin balala mesüra sentsü repranga bendanga amshiba anema nokdakba maparen pusemba, 'Black Lives Matter' ojang ajener aliba helmet aser black race suit semer race asayaba aser Grand Prix asaya shia nung temekok agi ali nung tsüketa apudakba atema Hamilton nem 'Laureus Athlete Advocate of the Year' award agütsü.

* 2021 Laureus Sports Award angurtem:

- Sportsman of the Year Award: Rafael Nadal
- Sportswoman of the Year Award: Naomi Osaka
- Team of the Year Award: Bayern Munich
- Breakthrough of the Year Award: Patrick Mahomes
- Comeback of the Year Award: Max Parrot
- Sport for Good Award: KICKFORMORE by KICKFAIR
- Lifetime Achievement Award: Billie Jean King
- Athlete Advocate of the Year Award: Lewis Hamilton
- Sporting Inspiration Award: Mohamed Salah
- Sporting Moment of the Year Award: Chris Nikic

Virat Kohli aser Anushka Sharma nati campaign ka tenzüktsü

Mumbai, Monupii/May 07, 2021 (Agencies): India Cricket team captain Virat Kohli aser pa kinungtsü Anushka Sharma nati India indang COVID-19 relief maparen atema campaign ka tenzüktsü sangdongogo.

Social media sabang ajanga Kohli aser Anushka napronglai India nung Covid-19 tensa mejungi küma aoba indang tebilemstü akaba lemsatep aser relief maparen atema tenati fundraiser ka achaayangba indang lemsatepogo.

Iba Fund nung apuani yagi sen cr. 2 tenla agütsüogo.

"Covid-19 wara adokba mapang nungi asen linük nung nübur aika timtem/terokong tia nung lir; asenok health system inyakyim nung tayongzükba tulu ajangshidaki, asen linük yaritsü asoshi asenok ajak longjemer inyaksüla. Covid-19 relief atema sen bendentsütsü asoshi 'Ketto' nung Anushka aser ni campaign ka tenzüktsüogo aser nenoki iba mapatong nungitra kanga dang pelatsü. Tilaka dang süaka, taküm ka kümzüktsü asoshi iba tenla ji tuluka lir," ta Instagram sabang ajanga Kohli-i lemsatep.

"Asenok ajak teka amteper inyak nungang" COVID-19 wara anema raratetsü ta fans ayongzükba mapang, Kohli aser Anushka nati iba mapatong (campaign) nung adentsü asoshi mepishiogo.

"Tajung tsütsü temelenshi ka adokdaksütsü asoshi asenoki akok tashi inyaksü, saka iba maparen akoktsü asoshi nenok teyari nungdaker. Iba campaign nung nenok ajaki mulungsoa adentsü asoshi ni mepishir. Asen lima kümzükba aser tashiita ayutsü asoshi asenok teinyaksü shilem ka inyakdi. Kanga pelar. Temelenshi adokdaksütsü asoshi kü bio nung link nungji click' süang," ta Instagram sabang ajanga Kohli-i lemsatep.

Kohli-i osang magütsüdang, taoba nung, Anushka-i social media sabang ajanga la aser kinungbo Kohli nati India nung Covid-19 wara anema raraba maparen nung mapatong ka tenzüktsütsü asoshi lemsatepa liasü.

Hokolbarnü, Anushka-i video ka ajanga, "India nung tensa tamajungba küma odaki aser nüburtem timtemba angudang temulung raksar," ta lemsatep.

Fans dang 'fundraiser' nung tenlatsü mepishiba mapang, Anushka-i, "Tilaka tenla yongjia iba jagi temelenshi adokdaksütsü," ta lemsatep.

Tawa tashi Indian Premier League nung Kohli-i captain ama Royal Challengers Bangalore nung shilem agiba nguogo.

Team balala nung asayar kar dak COVID-19 tashidak putetba sülen, IPL 2021 asayamung thitema liasü.

Tokyo Games atema Sumit qualify süogo



New Delhi, Monupii/May 07, 2021 (Agencies): Sofia kübok asaya aliba World Olympic Qualifiers asayamung, tebur 125kg category tetoktepba nung India nung Sumit Malik-i final tongtetba mapang, Tokyo Games atema qualify asür 'Indian men's free style wrestler' rongnung pa pezübuba kümogo.

Tokyo Olympics atema India indang tebur free style squad nung Ravi Dahiya (57kg), Bajrang Punia (65kg) aser Deepak Punia (86kg) nung den Sumit denogo. Arishi küm 28 tain Malik, shiba 2018 Commonwealth Games gold medal takok angur wrestler ka lir, Olympics atema pai tang mezüing Olympics atema qualify asür alitsü. Iba tetoktepba nung finalist tem Tokyo Games atema qualify asütsü.

Mezüing bout tem den medemdangra, iba Semi-final

asaya tenzükli nungi Malik-i kanga sashia asaya liasü aser pai 5-0 agi Venezuela nung Jose Daniel Diaz Robertti tsükdaksü.

Ajisüaka, külem India nung, Amit Dhankar (74kg) aser Satywart Kadiyan (97kg) naprongla asaya balala nung tamakok anguba sülen Olympics atema quota mengutet.

125kg category qualification bout nung Kyrgyzstan nung Aiaal Lazarev den asayaba mapang, Malik 1-2 agi Aiaal tesülen liasü, saka second 25 anünga lia pai meranga toktepba ajanga point ka ajangzükta tena 2-2 kümadok aser 'criteria' nung pai iba asaya koktet.

Tanabuba bout nung pai Moldova nung Alexandr Romanov den asaya liasü. Malik-i iba asaya 3-2 agi takok angu.

Tajikistan nung Rustam Iskandari den quarter final

asayaba mapang, Malik 2-0 agi tejakdang akümba sülen, pa 2-4 agi Rustam tesülen kümadok. Ajisüaka, Malik-i 'two-pointer' Rustam tsükdaksü.

Kasa asayamung nung külem India nung Dhankar-i Qualification bout nung 6-9 agi Moldova nung Mihail Sava makok. Iba asaya nung Dhankar 0-4 agi tesülen aliba mapang, second round nung pai kanga toktepa asayatsü merang, saka Mihail-i Dhankar nem maangka magütsü.

Dhankar tamakok ajanga aruya aliba Tokyo Games mapang tebur 74kg category nung India nungi shilem agir malitsü.

Quater final masayadang, Kadiyan-i Puerto Rico nung Evan Amador Ramos madak 5-2 agi takok angu.

Iba asaya mezüing round nung pa 3-0 agi tejakdang liasü, saka Kadiyan-i two-pointer ka mangudang Evan-i pa amokbanga asaya.

Bulgaria nung Ahmed Sultanovich Bataev den quarterfinal asayaba mapang, Kadiyan 5-1 agi tejakdang ser toktep, saka criteria nung pai iba bout mekoktet, kong asaya atemtsü second 20 anünga lia Ahmed-i point 4 tashi angu.

Shukla-i CM Relief Fund nung tenla agütsü

Kolkata, Monupii/May 07, 2021 (Agencies): India nung COVID-19 wara anema raraba mapatong nung yaritsü mechi, taoba mapang India nung cricket asayar, Laxmi Ratan Shukla-i Indian Premier League commentary nungi aazükba taa ajunga West Bengal indang Chief Minister Relief Fund nung tenla agütsüogo.

Shukla-i taküm küm tetenzüklen yimtenren mapa metoktsüdang, 2016 aser 2021 küm tsüingda pai Kolkata indang Sports and Youth Affairs Minister ama tenzükogo. Howrah Uttar constituency nungi Shukla ya TMC MLA ka liasü.

"Ni asoba anogo nungtem nung State indang maparen tsütsü IPL 2021 commentary nungi aazükba sen tenlatsü maangka anguba atema pelar,"

ta Shukla-i ashi.

"Nüburtemi ni nungita yariba ajanga tanü iba jenjang nung ni noktakteta lir. Tang ama tensa tamajungdang, ni asoba anogo nung, iba tenla tilaka ajanga tajung tsütsü temelenshi adokra, kanga dang tia taka nisung ka ama ni agizüktsü," ta Shukla-i shisem.

"Tang ama meimchir rokongba mapang, aseni akokba tashi asen shilem inyaksü merangtsüla, ajiasünungang iba wara anema asenoki raratetsü aser meimchirtem kümzükba aser pelaa alitsü asoshi temelenshi adokdaksütsü. Asenok ajak longjemer iba wara anema raraba maparen nung nokdakti. Lokti nungi pilar alitsü, temang merükmejuba den tejak nembangba mask inoktsü asoshi nenok kija shia dang mepishir," ta Shukla-i ashi.

BILEMDANGANG

"Teyazü kulibo aika alir, saka ochi kulibo ka dang alir."